

# REGLUR

## um meðhöndlun á fljótandi köfnunarefni.

### Gildissvið.

#### 1. gr.

Reglur þessar gilda um alla starfsemi þar sem fljótandi köfnunarefni er meðhöndlað og fellur undir lög nr. 46/1980 um aðbúnað, hollustuhætti og öryggi á vinnustöðum.

### Skilgreiningar.

#### 2. gr.

Með meðhöndlun er í reglum þessum átt við framleiðslu, vinnslu, þökkun, geymslu, flutning, notkun, uppsöfnun, breytingu eða annað þessu hliðstætt.

Með % er í reglum þessum átt við rúmmálshlutfall.

### Almenn ákvæði.

#### 3. gr.

Í vinnurými þar sem fljótandi köfnunarefni er geymt eða meðhöndlað á annan hátt skal vera loftræsting þannig að styrkur súrefnis verði ekki lægri en 20%. Ef styrkur súrefnis verður lægri en 20% skal nota ferskloftsgrímur í vinnurýminu.

Fullnægjandi skriflegar notkunarreglur og öryggisleiðbeiningar skulu vera aðgengilegar á vinnustaðnum.

Vinnuna skal skipuleggja og framkvæma á þann hátt að tryggt sé að bein snerting við fljótandi köfnunarefni geti ekki átt sér stað.

Ílát, leiðslur eða annar búnaður fyrir fljótandi köfnunarefni má ekki vera úr brennanlegu efni eða úr efni sem ekki er kuldaþolið. Hitaeinangrun má ekki vera úr brennanlegu efni.

Ílát undir fljótandi köfnunarefni skal hafa búnað sem kemur í veg fyrir hættulega þrýstingsmyndun. Búnaðurinn skal einnig vera þannig þegar það á við að hann hindri að vökvi losni úr ílátinu við flutning. Tryggt skal að búnaðurinn lokist ekki vegna ísingar.

Rör milli tveggja loka í leiðslu fyrir fljótandi köfnunarefni skal hafa búnað sem kemur í veg fyrir hættulega þrýstingsmyndun.

Hindra verður að fljótandi köfnunarefni leki út í umhverfið. Búa skal þannig um ílát sem hafa að geyma fljótandi köfnunarefni að þau geti ekki oltið eða fallið niður.

### Merkingar.

#### 4. gr.

Ílát sem inniheldur fljótandi köfnunarefni skal þegar það er meðhöndlað vera merkt með nauðsynlegum upplýsingum til að koma í veg fyrir heilsutjón og slys. Þegar fljótandi köfnunarefni er meðhöndlað daglega á sama vinnustað geta skilti á vegg með nauðsynlegum upplýsingum komið í stað merkingar á íláti.

Við inngang að vinnurými þar sem fljótandi köfnunarefni er geymt eða meðhöndlað skal vera skilti með eftirfarandi texta: „VARÚÐ. Fljótandi köfnunarefni“. Skiltið skal hafa greinilegan og auðlæsilegan svartan texta á gulum grunni. Ekki er þó nauðsynlegt að hafa skilti þar sem fljótandi köfnunarefni er meðhöndlað tilfallandi í litlu magni.

### Flutningur á íláti í ökutæki.

#### 5. gr.

Ílát sem inniheldur fljótandi köfnunarefni má aðeins flytja í ökutæki í vel loftræstu rými aðskildu frá öikumanni og farþegum með heilum vegg. Þetta gildir þó ekki fyrir eitt eða fleiri

**Endurprentað blað.**

Ílát sem innihalda samtals innan við fjóra lítra af fljótandi köfnunarefni né fyrir ílát með fljótandi köfnunarefni sem hafa þéttlokaðan ytri búnað þaðan sem uppgufað köfnunarefni er leitt með slöngu eða öðru álíka út fyrir ökutækið.

Ílát með fljótandi köfnunarefni skal við flutning vera örugglega fest til að koma í veg fyrir að það velti.

### Gildistaka.

6. gr.

Reglur þessar sem settar eru af stjórn Vinnueftirlits ríkisins samkvæmt heimild í 38. og 51. gr. laga nr. 46/1980 um aðbúnað, hollustuhætti og öryggi á vinnustöðum staðfestast hér með til að öðlast gildi þann 1. janúar 1996.

*Félagsmálaráðuneytið, 8. nóvember 1995.*

F. h. r.

**Berglind Ásgeirsdóttir.**

*Gylfi Kristinsson.*

9. nóvember 1995

Nr. 579

## AUGLÝSING

### um umferð á Dalvík.

Samkvæmt heimild í 81. gr. umferðarlaga nr. 50/1987 og að fengnum tillögum bæjarstjórnar Dalvíkur eru hér með settar eftirfarandi reglur um umferð á Dalvík.

1. Aðalbrautaréttur verður á Hafnarbraut, Skíðabraut og Gunnarsbraut og stöðvunarskylda á öllum götum, er að þeim liggja.
2. Mímisvegur, Böggvisbraut, Karlsrauðatorg og Bjarkarbraut verða aðalbrautir og biðskylda á aðliggjandi götum gagnvart nefndum götum.
3. Bjarkarbraut vikur fyrir umferð á Mímisvegi og Goðabraut. Mímisvegur vikur fyrir umferð af Böggvisbraut. Goðabraut vikur fyrir umferð af Mímisvegi. Vegur frá skíðasvæði hefur stöðvunarskyldu á Böggvisbraut. Umferð úr Svarfaðarbraut vikur fyrir umferð úr Hólavegi.
4. Á eftirtöldum götum verður 30 km hámarkshraði: Á öllum götum vestan Gunnarsbrautar og norðan Karlsrauðatorgs, þ.e. Karlsbraut, Bárugötu, Brimnesbraut, Ægisgötu, Drafnarbraut, Lokastíg og Öldugötu. Einnig á Ránarbraut, Martröð og Karlsrauðatorgi austan Hafnarbrautar.

Fyrirnefndar breytingar á umferð verða gefnar til kynna með umferðarmerkjum.

Ákvæði auglýsingar þessarar taka gildi þegar í stað.

*Sýslumaðurinn á Akureyri, 9. nóvember 1995.*

**Elías I. Elíasson.**